

FUTBOLA

XAKEA

Alkiza: «Ez dut atzera begiratu nahi»

Donostiarrak bere talde ohiaren aurka jokatu du igandean San Mamesen

Orain dela hilabete batzuk Bittor Alkiza Realeko jokalaria zen eta John Toshackek zuzentzen zuen Donostiako futbol taldea. Egun ez bata ez bestea ez daude talde txuri-urdinean. Alkizak erabaki gogorra hartu behar izan zuen, baina egun gustora dago Bilbon eta ez du atzera begiratu nahi.

RAMON BASALDUA / BILBO

Bittor Alkiza urte askotan bere alde izan diren jokalarien aurka ariko da San Mamesen. Denboraldiaren aurreko euskal derbia izango da eta donostiarrak Bilbon dagoenetik biziko duen lehenena.

EGUNKARIA.— Ez da zure aurreko derbia izango, baina oraingo honetan txuri-urdinak zure aurkariak izango dira eta Valenciaren atean barik Albercorenean gola sartzeko ahalegiarekin ariko zara.

BITTOR ALKIZA.— Zertan esanik dago gauza berezia izango dela. Ez dut sekula bizi, ez dakit zer gertatuko dudana. Lagun asko dut alde batean eta bestean eta niretzat berezia izango da oso.

EGUNKARIA.— Zure fitxaketak sekulako oihartzuna izan zuen. Ahaztu al duzu une latz hura?

ALKIZA.— Nik ahaztu dut. Oso gustora nago Bilbon. Taldea oso ondo dabil eta gauzak ondo ateratzen ari dira. Nolanahi ere, Realaren aurka jokatzeko berriz biziko dut giro hori. Hala ere, lehen esan dudana bezala zeharo ahaztuta daudak.

EGUNKARIA.— Urte asko eman dituzu Realean eta gauza asko pasatuko zaizkizu burutik igandeko partiduan.


ALKIZA.— Igandeko partidua berezia da niretzat eta ez dut sekula ahaztuko. Urte askotan bizi izan naiz Donostian eta urte asko eman ditut Realean jokatzeko.

EGUNKARIA.— Realak ondo ari da Ligako azken partiduetan eta zuzentzat ere puntuak garrantzi handia dute sailkapeneko goialdean jarraitu ahal izateko. Nola ikusten duzu partidua?

ALKIZA.— Derbiak desberdinak dira oso. Partidu hauetan ez du zerikusirik talde bat sailkapenean ondo ala gaizki dagoen. Berriak dira. Normalean ez da gol alde handirik izaten eta partidua zailak izaten dira bi taldeentzat. Igandeko partiduan ere horrela izango zerbait gertatuko da.

EGUNKARIA.— Jon Toshackek Realak utzi zuenetik taldea hobeto dabilela esan daiteke, emaitzen arabera behintzat.

ALKIZA.— Realak hobeto ari da eta puntuak lortzeaz gain joko



Bilbon oso gustora dagoela dio Bittor Alkiza donostiarrak.

XOUSE SIMAL

ona egiten ari da. Lau edo bost partiduko oso onak egin dituzte eta badirudi sailkapeneko behealde-tik atera dela eta goraka doala.

EGUNKARIA.— Denboraldi hasieran John Toshack zen Realeko entrenatzailea eta Bittor Alkizak Athleticera bidea hartu zuen. Hilabete batzuk geroago Salva Iriarte dago txuri-urdinen aulkiari. Denboraldi hasieran Iriarte egon izan balitz Alkizak Donostian jarraituko zukeen?

ALKIZA.— Orain erraza da hori esatea. Nolanahi ere, horrela izan zitekeen. Edozein kasutan nahiago dut horretaz ez pentsatzea eta ez dut atzera begiratu nahi. Orain dela oso gutxi etorri naiz Athleticera eta gauza asko egin nahi dut hemen. Batez ere lasaitasuna lortu nahi dut.

Suances eta bere orkatila

RAMON BASALDUA / BILBO

Athleticeko lehen taldeko plantila osatzen duten gizon guztiak aritu ziren asteartean Jaboi Irureta agindutara, zuri-gorrien entrenatzailearen pozerako. Atzo, ordea, Gontzal Suancesek ezin izan zuen Lezaman izan zen entrenamendua amaitu, orkatilan arazoak dituelako. Orain dela hilabete inguru bihurtu zuen Suancesek orkatila eta atsedean egun ugari izan duen arren, uste baino arazo gehiago ditu osatzeko.

Gauzak horrela, ez dirudi gertotarra igandean Realaren aurka jokatzeko prest izango denik.

Beraz, ikusi egin beharko da nola osatzen duen deialdia Jaboi Iruretak. Jabi Luke jokatzeko prest dagoen arren, Ernesto Valverde ere gero eta hobeto dago eta agian deialdian izango da. Bestalde, Genar Andrinuak ahaztuta du joan den asteazkeneko entrenamenduan izan zuen istripua eta azken orduko ezustetik ez bada Realaren aurka jokatzeko prest egongo da. Atzo Lutxanako Sporting taldearen aurka jokatu ostean, gaur Lezamara itzuliko dira zuri-gorriak. Jaboi Iruretak garrantzi handia eman dio igandeko partiduari, bi puntuak ezinbestekoak baitira sailkapeneko goialdean jarraitzeko.

Alexander
Morozovitz gaztea
lehen postuan
Iruñeko lehiak

IRUÑEA

Alexander Morozovitz errusiar izar gaztea, bost punturekin, Iruñeko Xake Txapelketako lehen postuan zen asteartean jokatuak zazpigarren jardunaldiaren akaberan. Bere atzetik lau puntu t'erdirekin berdindurik ziren Magem eta Zvjaginsev. Zazpigarren jardunaldiko bost partiduetan lau garaipen izan ziren. Morozovitz gazteak Korchnoi zaharra garaitzea lortu zuen. Gauza bera egin zuten Zvjaginsev Topaloven kontra, Comasek De la Villaren kontra eta Francok Rivasen aurka. Yudasinek eta Magemek parra egin zuten. Atzo honako partidua hauek jokatu ziren: De la Villa-Topalov, Zvjaginsev-Franco, Korchnoi-Rivas, Magem-Morozovitz eta Comas-Yudasin.

Xakea kirol olimpiko izateko aukera handia dagoela adierazi du Florencio Campomanes Xakeko Nazioarteko Federakuntzako lehendakariak.

BOLEIBOLA

Kubako
selektzioak
irabazi du
Sestaoko torneo

BILBO

Kubako selektzioa izan da Sestaoko emakumezkoen boleibol torneoaren irabazlea. Pronostiko guztiak bete egin dira eta nagusitasun osoz irabazi du Karibeko selektzioak Sestaoko torneo. Astearte gauean jokatuak azken partiduan, 3-0ko emaitzarekin irabazi zion Perukoari. Kubatarrek jokatu dituzten hiru partiduetan irabazi dituzte set bat bera ere galdu gabe.

Bigarren postuan Peruko selektzio gaztea sailkatu da. Jokalari jubenilez beteta etorri den selektzio honek bi partidua irabazi ditu, Portugalgo selektzioaren aurka eta Alcorcon talde espainiarraren aurka. Partidu erabakigarrian ezin izan zuen ezer egin Kubako selektzioaren aurrean.